

Facebook bantu sekat pornografi

BH - 12/2/2020 m/s: 3

Putrajaya: Semua syarikat telekomunikasi tempatan dan Facebook sudah memberi komitmen dalam membantu kerajaan menangani penyebaran bahan pornografi kanak-kanak di negara ini.

Timbalan Perdana Menteri, Datuk Seri Dr Wan Azizah Wan Ismail, berkata kesediaan itu dinyatakan dalam pertemuannya dengan wakil syarikat telekomunikasi itu, baru-baru ini.

Pada masa sama, Menteri Pembangunan Wanita Keluarga dan Masyarakat (KPWKM) itu berkata, persetujuan juga dicapai untuk meningkatkan kolaborasi antara agensi pelaksana undang-undang dengan Facebook,

dalam pertemuan dengan pihak berkenaan, dua minggu lalu.

"Ia bagi melapor dan menukarkan bahan jenayah di Facebook dan memudahkan pelaksanaan undang-undang terhadap kes pornografi kanak-kanak dan pergantungan kanak-kanak (child grooming).

"Prosedur Operasi Standard (SOP) sedia ada oleh Suruhanjaya Komunikasi dan Multimedia (SK-MM) kepada semua syarikat telekomunikasi akan diselaraskan bagi mempercepat dan memperkasakan penguatkuasaan undang-undang, terutama bagi kesalahan seksual terhadap kanak-kanak," katanya ketika merasmikan Hari Keselamatan Inter-

net (SID) 2020 - Edisi Malaysia dan Forum Memupuk Fasih Digital Di Era Millenia, di sini, semalam.

Pada masa sama, Dr Wan Azizah berkata, Lembaga Penduduk dan Pembangunan Keluarga Negara (LPPKN) juga mengadakan pelbagai program bagi menggalakkan ibu bapa dan keluarga bijak menggunakan gajet dalam berkomunikasi dan meningkatkan hubungan kekeluargaan.

Katanya, LPPKN juga sudah membangunkan Modul Pendidikan Keselamatan Keluarga dan Anak (PEKA) iaitu antara usaha serta sokongan kepada Akta Kanak-Kanak (Pindaan) 2016.

Menyentuh mengenai jenayah siber, Dr Wan Azizah berkata,

berdasarkan statistik Jabatan Siasatan Jenayah Komersial Polis Diraja Malaysia (PDRM), sebanyak 11,875 kertas siasatan jenayah siber dibuka pada tahun lalu, berbanding 10,753 kertas siasatan pada tahun 2018.

"Jumlah kerugian daripada jenayah siber pula meningkat 24.9 peratus kepada RM497.7 juta pada tahun 2019 berbanding RM398.6 juta pada tahun sebelumnya," katanya.

Daripada jumlah berkenaan, jenayah penipuan telekomunikasi masih mendahului dengan kerugian RM254.6 juta, manakala jenayah penipuan e-kewangan pula mencatatkan kerugian RM135.9 juta.